



KBC THUSO

BULTE-LHAKAO/FEBRUARY & MARCH 2023

KUM
62
Ihinna
So518

Regd. No. 19134/88
<https://www.kbc.org.in> NAI/220/99
No-G4/Regd. Magazine/
KBCThuso/MNP-81



Kipunkhatna

Upcoming events

Missionary Sunday - 05
KBC Day of Prayer - 12

**"Kapa theng eini pumkhat Ihi bang a amaho jong pumkhat
ahitheina ding un, Nangman amahohi hong in"**

John 17:11

**Mother Church T.vaichong mun a Pastor ding
Pastor Paolam Kipgen gaki thah lut na**



**Centre Church Sing-at mun a ding a Pastor
thah Pastor Jamkhohao Haokip chu Rev. Lamkeng
Lhouvum Mission Secretary in aga thah lut tai.**



**Kamuching Baptist Church in Pastor ahin thum u phatsahna
akinei pi dungjuijin Pastor Hemkholen Haokip chu
Rev. Tongmang leh Rev. Lunkhosei in ana thah lut tan ahi.**



CONTENTS

THUMAKAI HO

KIPUMKHATNA TOHGUON/ <i>Editorial</i>	1
CHRSTIAN INSUNGNOM/ <i>Vahboi Baite</i>	3
KUKITE LAH'A MISSION NATOH/ <i>Rev. Onkho Haokip,</i>	5
Pumkhat hidia kou ihiuve/ <i>Rev. Dr. Thongkhosei Haokip</i>	11
Mission Column	15
Men Column	18
Women Column	22
Youth Column	25
Music Column	26
Holistic Development Column	27
Literature & Publication Column	28
Christian Education Column	30
Assembly Report	31
Office/Gambih Diary	33

EDITORIAL BOARD

Chairman : Rev. Khupkhotang Kilong, President KBC
Editor : Dr. M. Thongkhosei Haokip, General Secretary
Joint Editor : Rev. Lunkhosei Tuboi
Contributing Editors: 1. Rev. Thongkholun Touthang
2. Rev. Lamkeng Lhouvum
3. Rev. Tongmang Haokip
4. Ms. Tingneihing Kipgen
5. Rev. T. Thangkhosei Haokip

Design & Layout - Hemkholen Haokip
Circular Manager - Ms. Vahboi Baite
Recorder Ms. Vahnunnem Haokip

THUSO LAHMAN

Church/Organisation/Department : Rs. 300/-
Individual : Rs. 200/- (Post a Rs. 250/-)
Indian Overseas Bank, Imphal Branch
A/C No. 073201000000350 IFSC No. IOBA0000732

The General Secretary,
Kuki Baptist Convention,
Opp. D.M. College, Imnphal 795001, Manipur
email: kbcindia@rediffmail.com

Advertisement bolnom hon Mobile No 8414919588
Circulation to kisai lam Mobile No. 8119030725 bolding



KIPUMKHATNA TOHGUON

EDITORIAL

"Tuvangin masanga nagamlat vangunChrista Jesua naum jeh uva Christa thisan vanga chu anaiya nahitauve. Ajeh chu Ama chu eiho kichamna ahi, Aman daltanna banglai chu aphetlhah a ania chu pumkhat aso ahitai." (Ephesians 2:13-14.)

Amasatah in muntina um Kuki Christian chatejouse ahideh a KBC member ho jouse chung a iPakaiyu Jesu Christa minin salaam kahinpe cheh uve. Kum thupia ineiyu chungchona lhatin thupi inei kit un, tulha thupi chu ahileh 'Kipumkhatna Tohguon' kiti ahitoh kilhonin, i houbung leh lhangpi hinkhoa sahphat ding tampi lah a pumkhat hina ding hi jong poimo tah khat in kagelin ahi. Hiche article ah hin Kuki Christian te lah a adeh a houbung sunga kipumkhatna ipijeh pena ngaicha ham ti itahlang nomun ahiye.

Kipumkhatna umding dei jalla Christa thi ahin, chule vannoiya Ama thu lhangsapna dinga poimo ahi. Christa houbung khat semdohna dingin masanga kimelma a anaum Juda ho le gentile ho kah a kibung khenna chu Cross a suhkeh ahitai. Christa chu houbung kipumkhat dinga thi ahitoh llhonna eihon jong kipumkhatna itudet jing diu apoimo lheh e.



lpu-ipa houva inaum laiye chun khochom chom leh gam chom chom kithetna leh kimudatona anaum in ahi. Lhumlam gama kona Missionary hoa konin Christa kipa-na thupha ina kisanuvin, hichea konin jat khat leh jat khat kilungsetna leh kingaidam tona anauvin ahi. Ahin, chubanga phatah a kipan ahivangin, khonungin Satan nato hatna jallin hitobang kibung khenna hi Christian lah a jong ahung umdoh kit tan, masang tobang ihi kit tauvin ahi.

Tulaiyin Kuki lah a Kuki Christian Leaders Fellowship (KCLF) ibol nauvah, Kuki deiho houbung phabep lah a jong pangnom lou, kimkhat man Kuki kahipouve tiloi, kimkhat man malaiya relief kihop laiye alung lhai lounau jalla chomdoh loi, hitihin lungneo chacha pun ium tauve. Manipur polama hon jong ama/ama kiva theina dingin loitum asemuvin ahi. Sapte thuchih in, "United we stand, divided we fall" atibanga amaho jalla nampi hihen Christiane hijong leh iluhna diu naicha ahiye.

Hijeh chun aphot chaa ikhah doh cheh uva Kipumkhatna hi angaicha mong khat ahi ti ihet u toh kilhonin iumna jouseuva Christianho kah hihen adangho kah hijongleh kipumkhatna dinga palai ihi cheh diu hi eikikounau ahi ti sumil poute. Lungluttah a simho jouse chung a Pathen vangboh chang cheh tauhen.





CHRSTIAN INSUNG NOM

Vahboi Baite
Receptionist. KBC

SERMON/ARTICLE

Thumakai:

Tutua Enamsung, Egamsung, Ekhosung le Houbung dinmun lhagao lungmit a evet le pohnat aumlheh jeng in ahi. Lhagao lam le tahsa lam a lamkai ho iheovin chule Mipi ho eheovin Lhagao tahsa a phatthei chan nale khantou machal umna ding ahin amasa tah in eima cheh le l insungcheh semtup a Christian insung nom hi masat angaije.

Insung kiti hi Pi le pu, Nu le Pa, Chate, Moute le tute insung khat a chengkhom, Nekhom donkhom le umkhom ho ahin Chule Chengkhom hih jongle Insungmi ahi. Innom tah le asunga thil ngaichat jouse kim in umhen lang edei jouse kinei thei ding hijongle Asunga chengkhom ho kingailut le kihetthem na le kilungkhat na aumloule insungnom lou ding ahi. Chule inn nopmo a chenle vaichat jeh a jong insung nomjeng di ahideh poi.

Insungnom semdoh nading ahin teamwork angaije. Ajehchu achengkhom ho jousen pan alakhom loule mikhat le ni bou panlah na achu nomjou lou ding machal na jong um lou ding ahi. Christian insungnom ehiso thei nadeovin noiya hin point phabep ana velhao hite.

I. Penthah na: Hou in kaijing, Hopsom maicham pejing, taona neiijing chuleh Hou lamkai hivang a pengthah le vangam lutdi ahipon, Hinlah Pathen in Jesu Christa thisan a eilhat doh nao tahsan a kisanlut ho chu

mi pengthah ahin chule chungakisei Pathen thua kiman chah na ho jouse chu mikhat chun Pathen aneiteng a lunga Jesun vai ahom tahjeg a chu ijakai a Pathen a dia pan alah a lhagao tahsa khangtoui ahi.

Eph.2:8 na emu bang uva mihing tehi lungsetman le tahsan vanga huhhing um ehio ahi. Hijeh a chu insung khat a cheng khom jousen Penthah na dihtah nei ding ahi. Hichun ijakai a tahsa lam le lhagao lam kingailutna le kihetthem tona aumsah a kipumkhat nale machalna aumsah ahi. Hijeh a chu Chrstian insungnom ihi cheh nadeova chu Christa neima sat ngai ahi.

II. Ngailutna: Engailut khat chun bolkel le seikhel ijat neijongle hetthem na akinei in ahi. Chuma banga chu Pathen in nang le kei engailut jeh a, nitin in a elhin lal naho jong engaidam jing uva chule tonsot a thiding sa jong tonsot hinna eieh u ahi. Jn15:10-14 a Pakai jesun Pathen in eingailut a Ama thua ka um bang in, Nangho jong kangailutna a um un eitio ahi.

Ist John a jong ngailut na neilou chun Pathen aneilou ahi ahi ati. Pathen neichun Pathen angailut keo hilou a asem sa mihem jong angailut di dol ahi. Eihin ngailu ho bou ngailut a eingailu lou lou khohsa lou kiti hi Pengths hon abolpoi. Min nahin ngailut ding-bou nadei a nanga a kon a ngailutna alondoh loule na lhagao lungthim nakikhol thah angai e. Chuti ahijeh a chu insungnom hina dia jong achengkhom jousen ngailutna dihtah neisoh kei ding ahi.

III. Ngaidamna: Mi pengthah dihtah chun itobang in lungnat-na neijongle ngaidamlal anei-pon ahi. Ajehchu amatah jong ngaidam hoi hilou a Pathen in angaidam na akihetchet jeh ahi. Mihing khatchu koima seikhel lou, bolkel lou umlou ahi, hijeh a chu adih lou pen in jong ngaidam kithum a nungbol kittah lou ding chule Mingaidam a pang ding hon jong ngaidam na nei a khonung a velsei2 a nungphoh doh tah lou ding ahi. Hichun chamna asosah ji ahi.

Eph.4:32; Colo.3:12-13 Hilai Bible sung hi evetle Mihem hina lung-han lungchom aumteng jong le Pathen jal a kingaidam a lung-han pi jing lou ding tin eihil uve. Ngaidamna kiti hi ngaidam a umho keo hilou a angaidam ho ding a jong lungthim damna le kipana ahi. Mi ngaidam theilou misuhkel melchih jing mihem chun ahinkhoa kipana aneilou ding ahi. Pathen dihtah nei hon vang ngaidam lal anei poi.

IV. KIPUMKHAT: Insung mi hikhom jongle kilungkhat nale kipumkhat na aumlou le khantou machalna insung a umlou ding ahi. Insung kah a jong langnei sihnei na aum le damna aumthei poi. Eph. 4:3-4; 1st Corinth 1:12-13, Tahsa le khang nua mou le tui hi keo hilou a lhagao a jong tahsan khat ihijeh a kilungkhat ngai ahi.

Football Player them tah khat jong chu a team mate hotoh phatah akilungkhat lou uva ama madon don a akichep ule goljona anei thei lou deo ahi. Hinlah team members jousen ama bolthei nacheh anpohdoh uva pan ahin lah khom teng ule bou goljo na anei uva vannoi a jong hetthei hijio ahi. Christian insungnom hina dia jong hi insung mi jouse ijakai a kithokhom a panlah ngai ahi. Mikhat le ni bou nganse lou ding ahi.

Thuchaina: Pathen neite insung chu jalah a alhatle teng jongle hetthei in aummin ama mimal hinkho jong midang din kitilkhoh na ahijinge. Pentah na dihtah nei chun ngailutna le ngaidam na hinkho anei a chule midang to apha lam a kipumkhat na lungput jong aneije. Ebon chaova hiche point li hi echepi teng ule insungnom ihi cheh uva, insungnom ahiteng le Houbung sung khosung, gamsung le namsung Pakai lunglhai na ihideo chule lhagao le tahsa phatthei nale khantouna ahi. Pathen in asim jouse phatthei boh taken.





KUKITE LAH'A MISSION NATOH HUNGLUT

Phatthei akichanpina le akisangkhelho

Rev. Onkho Haokip,

Pastor, Central Church Neihsial Veng, KBC Gambih No. 9

SERMON/ARTICLE

THUMAKAI

Hiche thumun hin alhangpi in 1900s apat 1980s kum vel chan Kukite lah'a mission natos honglut dan le machal dan chule Kukite'n ana sankhel'u thusimho ahop in ahi. Hiche thumun ah hin Gikhenna (outline) ni in akikhen in ahi. Hiche teni chu: (1). Mission natos in Kukite ding'a thil phachom ahin pohlut-ho, le (2). Mission natos hong lut jouva Kukite in ahethkel le asankhel'u thil phabep ho.

I. MISSION NATOH IN KUKITE DING'A THIL PHACHOM AHIN POHLUT-HO

1. Manipur Sahlam Kukite lah a Kipana Thupha Lutdan

Edinburg kiti Scotland gam a January 5, 1859 kuma ana peng a Livingstone College, London a themzilna ananei Pu William Pettigrew kitipa chu Manipur sahlam gamkai Kukite lah a Pakai Lhacha natong masapen ahi. Manipur gam leiset a Britishte kivaihomna suhtoh a ana um phat in February 6, 1894 in Imphal khopi alhung in Meitei (Hindu) lah a adoudal mi ana um jeh chun Ukhrul a school anaphut in ahi. 1910 kum in hiche school a chun Kukite lah a Kipana Thupha jop masapen a kihe Pu Ngulhao Thomsong chun Pu William Pettigrew ana kithopi lhon in hichea kon chun Kukite lah a Pathen hou

akibe jing tan tahsan twilut jong apung jing tauvin ahi. Pu William Pettigrew agam lang a chomkhat kholjin kah a ama khel a um Pu UM Fox chun Ollha 12, 1914 nikho in Tujangvaichong haosapu, Pu Songjapao Kipgen jaona in mi 12 chun Pathen atahsan tah jeh un Karong vadung a tahsan twilut abolsah tan Tujangvaichong Houbung ana kiphutdoh tan ahi. Tujangvaichong ban in Tongkoi, Chaljang, Songphel Khulen, Gelnel, Kachai Kuki, Lhongchin chule mundang dang a houbung ana kiphutdoh jing in 1945 kum chun tahsan twilut mi sangthum analhing tan Houbung jong changna bang in ana nikhan jeng in Pathen in a phungvuh

jing tan ahi.

2. Manipur Lhanglam Kukite lah a Kipana Thupha Lutdan

Wales gam a Carneervon kho a peng RR Torrey Sermon a kon a September 21, 1889 nikhoa ana pengthah Welsh Mission a natong Dr. Peter Fraser toh Aizawl khopi a lhacha na ana-tong Gollhang Watkin Roberts chun Manipur lhanglam gamkai a ding in Pu Thangkai le Pu Lungpao Vaiphei toh pheiphung anason in Bulte 5, 1910 nikho in Senvon kho analhung un ahi. Khosung alhun jou un Kipana Thupha alhangsap pai jeng in haosapu, Pu Kamkhol-un Singson jaona in mi gup in Pathen ajop tauvin May 7, 1910 nikho in Manipur pumpi a Kukite lah a Houbung masapen chu Senvon kho a anakitungdoh tai. Senvon Houbung ban in Leisen, Khopibung, Malte, Bualtang le Chawngkhozo chule adang dang akiputdoh jing in ahi. Pakai lhacha nato machal theina ding in Thadou Kuki Pioneer Mission (TKPM) anaphutdoh un Ollha 26, 1914 nikho in Senvon khopia TKPM Khoppi masapen anabol un mi 100 lhingdeh ana pang uve. Tolbol 12, 1922 in Zekra-dawr a khoppi ana bol kit un mi 400 ana kikhomdoh un chule 1923 kum chun Manipur lhanglam gamkai a Kuki mi Pathen hou chu mi 2800 vel anahitan chule

TKPM chu North East India General Mission (NEIGM) tin 1925 in ana kikheldoh in 1940 chun houbung 357 analhing tai akiti.

3. Kukite Pakai Lhacha Natohdan

Kukite chun Kipana Thupha anasan tah jeh un aheng akom, gamdang le vanoi a Kipana Thupha anasamphong son tauvin ahi. Pu Ngulhao Thomsong chun Anal Kukite lah a Evangelist na nasatah in anatong in kumthum sung in mi 334 in kipana thupha ana kisan man un ahi. Pu Teba le Pu Longkhobel Kilong in Kom Kukite lah a Pathen na nasatah in anatong lhon in chomkah in mi 200 tahsan thah akimusah lhon in chujou in Anal Kukite lah a ana che lhon in chomloukah in mi 800 in Pathen thu anajop kit tauve. Pakho Sitlhou chun Rongmei pao themself in ahinkho tamjo chu Rongmei Naga lah a Pathen nato nan anamang in ahi. Manipur Lhanglam gam a chun Kukite chun kilungtoh tah in anatong khom un Kipana Thupha lhangsap in mi 22 ana sol un mikhat in lhakhat a dangka chenggup cheh anasang un ahi. Amaho chu Bible Teacher le Evangelist ti'n ana kiheuvin Hmar, Lushai, Gangte, Paite, Thadou, Simte, le Zou chenna



lah a Pathen na nasatah in anantongkhom un ahi. Manipur gam pam lang a ding in Tripura gam a Pastor N. Luaia ana kalsong in, Darlong a Pastor Laibat le Thanghrim ana kalsong Ihon in, Lakhimpur a Pastor Khuma ana kalsong in ahi. Chule India gampam Burma gam a Tongkam Singsit anakalsong in ahi.

4. Kipana Thupha in Kukite Sakho Dinmun Aphatchom-sahnaho

Kukite in gal le tol jeh a gen-theina le nat le sat atuo jing uva chule lhagaoboh le thilha sangah tia aheth u lhagao phalouho akon hamsetna le chehchaona aneilai tah un Christa Kipana Thupha alah uva avahlut tan alah uva sakho dinmun abungbu avaipei in akikhel tan Christa jal in tonsot hinkem lou aneithe tauvin ahi. Phat masa a Gal-Lu la anahiu jongleh Lhagao Gamlang ahi-tauvin ahi. Thingphung, songphung, gammang, vadung pang chule lhanmoul khat le ni chu Satan le thilha chenna a anagel uva si umna munho thilha le kao umna dan a anagel jeh uva lou a analho ngamlounau munho chule adonlou louva lunggel suhto a tahsan tamtah ana nei chengseu chu Christa Kipana Thupha asan uva Lhagaotheng anei tah jeh un abeigam tan Pathen heng a

atao jo tauvin ahi. Naosen athisa a apen leh vangset umtah a agel uva mihem athi joutengleh alhagao ding a lhanmun a an athahpeh u jong akisubeitai. Chule lhagaoboh vop ahilouleh kaose namse anahiho chengse jong thanei tah le hatjo Christa Lhagao asunguva achen tah jeh chun lhagaoboh le kaose in mun anei tapon amanggam tauvin ahi. Doibomho, lhagaoboh thaneinaho akisubei in doile kaoho le thilha sangah koma kilhaina thilto kitiho akisubeigam in alah uva tonsot hinkemlou alhungjo tan ahi.

5. Kipana Thupha in Kukite Jalhang Hinkho Aphatchom-sahnaho

William Pettigrew chu Manipur a Kipana Thupha le Themzilna toh alhung khom jeh chun Kuki chapa phabep chu Ukhrul School a ana kai un ahi. Khonung in mun khat le nia Clerk le Zilkung dinmun anachang un ahi. Pastor le Evangelist dinga zilna neiho jal chun 1917 kum apat in Kuki nambah lah a Bible lekhabuho athem them in akiledoh tan achaina in Bible pumpi anakiledoh thei tauvin Hmar paovin 1968, Thadou/ Kuki paovin 1971, Paite paovin 1971, Vaiphei paovin 1981, Zou paovin 1983, Gangte paovin 1991, Simte paovin 1993, chule Anal paovin 2008 kum in ana

kiledoh in ahi. Themzilna jeh in Kukite lah a MLA, MP, Lekhath-em, Bible them le Nam natong-ho tamtah akisepdoh tan mimal tahsa thenna, damtheina, nih-chen ponsil, insah dan le insung semdan, mot lei, lengthei lei, kolchu lei, komla lei, haithei tudan, moja sahdan, ponkhon dan, ponkhui dan, thing thembol dan, ahcha vah dan, vohcha vahdan, chule adang dangho Missionary-ho a kon in hetsah in ana um in sumlepai chule inchen khochen vengchen nasatah in ana khang tan ahi. Vannoi khandouna leiset a khantouna thah tamtah lah a kipuilut ahitauvin India gamsung chule vannoi chitin namtin khandan le chondan chule khantouna to malam-jon in pan alathei tauvin ahi.

6. Kipana Thupha in Kukite Gam le Nam Kivaipohna Aphatchomsahnaho

Kipana Thupha lhun jou a themzilna lam a thepna aneitah jeh un nam ngailutna aneinau banjom in kivaipohna akisemhoibe thei tauvin sopi khat ahinau jong ahethdohbe be un agam ule ahinau avel in amanlut dan ahedoh un ahi. A thaneinau aki-hetdoh tah jeh un Sorkal a kon lampi semphatna ding, khosunga themzilmun umna ding, twi mutheina ding, khosung vengsung le gamsunga chanvou umho le adang dangho hangsan

tah in athum un achang thei tauvin ahi. Gamsung le sorkal a panmun le chanvou tampi aneithei u ahedoh un, MLA le Minister atet un Manipur, Nagaland le Burma gam sung a MLA le MP akailounau kum aumbek tapoi. Gam le nam kiledohna ding in 1946 in Kuki National Assembly (KNA) kiti kiloikhomna ana semdoh un India sorkal heng a ngeh ana neipan tauvin ahi. Hiche banjom chun amaho sung a nam-bah tamtah in jong kiloikhomna tamtah anasemdoh un ahi. Khosung le houbung sung a Khanglaite Kiloikhomna, Nute Kiloikhomna, Pate Kiloikhomna, Sunday School akisemdoh in tahsa lam themzilna suhatna ding in simlai kiloikhomna tamtah akisemdoh in kichep golseh suhatna ding in agamkai dungjui in kiloikhomna tamtah akisemdoh in chule genthei hahsaho kithopi ding in kiloikhomna phabep akisemdoh un ahi.

II. MISSION NATOH HUNG LUT'A KUKITE IN AHETKHEL LE ASANKHEL'U THIL PHABEP HO.

1. Kipana Thupha in Kukite Chondan Aphatchom sah louna ho

Pula pala kai a la anakisa chu Pathen thilpeh khat chu ahin



hiche lakai a Pathen thangvah chu chonset hidehlou hijongleh Kipana Thupha Ihunkal Kukite lakai dan atamjo lhumlam gam lakai in akisa gamtan ahi. Amaho chu lhumlam gam mi hihih jongleu lhumlam mite bang in la asatauvina ahi. Lawm le Sawm ana um chu suhmang in aumtan Bible toh kitoh hih jongleu chondan le kihilna atamjo Houin mun a akibol tamjo tai. Lhumlam gam chondan chu Christian-te chonna a anasan khah tah jeh un amaho chondan le ahinnau abonchan ponbang in akihohlha tan chondanho akisuhlih phat chun namdang sanga noi nungjo le hahsajo dan in akilangdoh un ahi. Insung le sopi kikhah a kiguijopna hoitah ana nei uva ama phung sanga panmun le kiminsah dan aneicheh u ahin mihem khat in apa sopinu chu Ni ati a, a-ni jipa chu Gang ati ahi. Achateu chanu ahiloule chapate chu Tutia kiminsah ahiuvin Tute chun anu apa pate chu Pu asah un anu apa nute chu Pi asah kit u ahi. Hitobang a kiminsahna jal chun sopi khat ahinau akiheto jing un hichun akankhom jing un ahi. Ahin hitiho jouse chu Kipana Thupha Ihunkal in seitheikhop hel in alhasamtan khangthahte khankho a Pu, Pi, Tu, Ni kiti ngailutnaho aumbek tapon kiguijopna le kingailutna

adailha abang tan ahi.

2. Kipana Thupha in Kukite Jalhang Hinkho

Aphatchomsahlounaho Manipur lhanglam a Thadou Kuki Pioneer Mission (TKPM) ana kiphudoh a, Paite lah a Hangshing le Vaiphei tamtah aum a Guite Thadou pao thona gam a umhon Thadou pao atho uva Paite pao thona mun a umhon Paite pao atho u, chule Kangpokpi khel a Changoubung Vaiphei kho in Thadou pao atho chun phat masa chun nambah le phung ngailut tumna umlouhel in ana chengkhom uve ti aphongdoh thei in ahi. Chuti chu anahihenlang Kipana Thupha in ahinpohlut hihih jongleu ahunglhun kal a kimu jing chu phung ngailut le kichangtum ngailutna ahi. Kut le Golnopho chu Kukite thisan toh kisukhen thei lou ahin Sa-ai, Chang-ai, Kut, Lawm-kivah/Lawmselneh, le Chon le Han tiho chu angaisang dehset u ahi. Akibol danho chu lamdang jep le thilha sangah houho thilbol bang jongleu Chung Pathen in lamchom chom a phatthei anaboh jeh uva Ama thangvahna a anaboljiu anahin hiche jeng jong chu ol ol in amanggam tai. Amaho chun japi hop in hinkho anamang un koima avai le ahao khenna anaumpon abonchavun ngailutnan ana kankhom soh un mikhat in gamsa atha jongleu inson a sachan ahop tei ahi. Ahin

lhumlam gam mite changtum hindan chun ahin lonkhum jeh un lungkhat le thakhat a analengkhomte changtum hinkho in alamkaijo tauvin ahi.

3. Kipana Thupha in Kukite Lhacha Natoh a Aphatchom-sahlounaho

1929-30 sung chun Manipur lhanglam gamkai a missionary-ho lah a sum jeh in boina ana um in Watkin Roberts le Dohnun apang lhon in alang khat a chun Coleman le aloiho ana pang un achaina in Watkin le aloihon Independent Church of India (ICI) anaphudohlo tauvin ahi. Manipur sahlam gamkai achun William Pettigrew chun Tangkhul-ho ana khohsah in Dr. Crozier chun Kuki-ho anakhohsah jepkit in amani kikhah a kihetkhelna analhung in ahi. Hiche chungchon chun William Pettigrew le Watkin Roberts jong lhacha natohna gam jeh in ana kihetkhel lhon in achaina in gam ana kihop khih peh lhon in ahi. Lhanglam gam a Roberts le aloiho kah, sahlam gam a Pettigrew le aloiho kah, chule lhanglam missionary le sahlam missionary kah a lung kibah louna le kihetkhelnahtobang chu khonung in Kukite lah jong kikhentelna aumjing tan ahi. Kukite chu Manipur a

kiloikhomna sem masapen loi ahiuvin Pathen hou sang a kiloikhomna ngailujo jong um in akilang un ahi. Chule Kipana Thupha in Kukite anavil til chun sumlepai, themzilna, khochen inchen le thildang tampi in kithopina anamu uvin anaphatchompi lheh jeng uve. Ahin lhagao mangthai ding gelkhoh talou a gamdang a kon kithopina jat chom chom avetlhih nalai u lhaset um tah ahi.

THUCHAINA

Kukite lah'a Mission natoh hung lut dan akivet akon in machalna lentah le tamtah akimudoh theiyin, Missionary masaho jal in Pathen thangvah aum in ahi. Tunia jong iumna mun le eima panlahna thei channa Mission natoh'a pan ilahnauva kon in mi tamtah dingin hinna le damna in apang theiyin ahi. Alangkhat'a Mission na kitohna mun'a Pathen le lhagao thudol in kihelna kipolut jongleh ahithe i channa mihem chondan khandan le hinaho hi sukhah lou ding in aphan chule eima jeng injong Pathen thu ijop jeh'a eima chondan le hina jouse paimang leuva lunggel nei lou ding jong aphan ahi.



“Pumkhat hidia kou ihiuve.”

Rev.Dr. M. Thongkhosei Haokip
General Secretary, KBC

SERMON/ARTICLE

Vetan, sopi le sopi kipum khat a achen khom teng iti phat a pha lung lhai um hitam! Luchunga thao mantam kinua khamul geiya jolsuh jeng tobang, Aaron khamul geiya jolsuh peh a asangkhol chol ngongkoi geiya jolsuh bep ahi! (Psalms 133:1,2).

Chule keima vannoiya hi kaum lou ding ahitai, amaho vang hi vannoiya aum-na lai uve, chule keima nahenga hung ding kahitai. Ka-pa theng, eini pumkhat ihi banga amaho jong pumkhat ahitheina dingun, nangman amaho hi hongin... Amaho chu pumkhat ahina ding uva, Pa, keima nangma sol kahi hi vannoi miten atahsan theine dinguva nangma keiya nauma keima nanga kaum banga hi, amaho jong einia aum theine dinga katao ahi” (John 17:11,21).

Chuti ahijeh a chu Pakaiya sohchang keima naheng uva kahung tao ahi. Nangho naki kounau toh kitoh in chonun; chonnemna bukimin, lungnem toh, thohhat-toh thon chonun; ngailutna in khat le khat kingai themun. Chamna in kikanun Lhagaova pumkhat hina dingin kihabolun. Tipum khat ahin chule Lhagao khat ahi; hiche banga chu nakikouvu jong chu kinepna khat a kikou nahiuve; Pakai khat, tahsan khat, baptize chan khat ahi. Chule mi jouse Pa le Pathen khat she bou ahi; Ama imajouse chungah ahin hoima jousea um ahi, chule lungsung jousea um ahi (Ephesia 4:3-6).

KBC Thusim Chomlam:

Kuki Baptist Convention in Kum thupi ineiyu chung chonin lhaseh a thupi chuom chuom ineiyu ahitoh kilhonin tulha hi “Kipumkhatna” ti ahi. Ajeh chu kipumkhatna jalla KBC ana kiphudohna lha chu ahi. Tukum jong KBC kiphudohna nikho (16th March, 1958) kum 65 lhinna mang dingin igaldot cheh tauve. Anikhotah chu Pakai nikho ahikhah lou jeh chun akinaipipen nisim 12 March (Sunday) nikhohi man a, thilto inei houhi genthei hahsa kithopina a che ding ti ahiye. Kum tam-pi ihin manu chu ahivangin, hitia KBC kiphudohna geldohna le khohsah tah a iman beh luvun akihei. Tukum hi eima houbung cheh a hiche nikho phatah a program jong ikisem uva, phat danga anikho thilto maimai hilouva program jong special tah a ibol uva, KBC kinbol-na ho dinga atuma taona nikhoa iman diuvin jong hetsah na le tiemna ahung kineiyen.

Ihetmau bangin, Kuki holah a Christian/Baptist hina hi 1914 lama houbung ana kiphutdoh hita jong le kum phabep jou tichu 16th March 1958 nia chuche laiya ana um KBA (Motbung centre) le NEKBAM (Phaicham centre) chu anakigom khoma Kuki Baptist Convention tia hung kiphutdoh ahi. Ahin, kum phabep ache nungin hiche kimpinphah teni hi pao (language) jeh le nei-le-nga (property) jeh hin akisubei tasa KBA le NEKBAM anung chohing kit un, amasa chu tuhin TBA asoh in, anukhah jo chu Ch.BA (tua CBCA atiu) ahung soh doh kit in, amani chun KBC akisubei tai ana tilhone. Dan dungjuiya ivet le adih lheh jeng chu anahie. Ahin, akisubeiya aseilhon pen chu kidang tah in Manipur a Kuki chate lah a houbung lenpen le amachaalpen ahung hitan, Pathen thil kidang natohna ahitoh kilhonin Ama chu loupina le choi-atna chang jing taken! Labolpa’n “Insa hon adeimouva apaidoh sau song chu In ninga songpi

khomdet penin apang tai. Hiche hi Pakai thilbol ahin, kamit vet uvin akidang behseh jenge” (Pss.118:22,23) ati hi adih tangeiyin ahi. “Eiho din Pakaiyin thil nasatah tah abolin ikipah tauve” (Pss.126:3).

Ipi jeh pena aumtalouva kisei chu tunia hiche dinmuna ium theiyu ham ti hi gelkhop set thei ahi. Ajeh adang tampi umjong le Pathen lungdeiya akiphu jeh jong hidingin tahsan aume. Chule, Ajeh chu, KBC hi phung-le-chang le thildanga kiphut louva Pakai Jesu thiempu hina a leiset adalhah kona ana taona: “Kapa Theng, eini pumkhat ihibanga amaho jong pumkhat ahina ding uva katao ahi”(John 17:11,21) ti bulhit sah ding chu ideiyu toh kilhonna ithupi (theme) a jong ipansah u ahi. Hiche toh kilhonna i motto u chu: Kipumkhatna (Unity), Pathen thu lhangsapna (Mission), chule Lhacha kin bolna (Service) ti ahiuve.

Kipumkhatna dingin mun jousea KBC makaina in pan akilan’n, thilchom chom le Christian kibahpi Baptist hihen hilou jong le tohkhomna theitheiya akitong khomin, CBCNEI-MBC, KCLF, AMCO, chule adang dang jong ahiuve. Mission natoh na in India polam le sunglama jochanin kipana thupha phuondohna akineiyin, missionary ho le evangelist tampi akigoiye. Nepal a kum 40 jen mission na inatongun, aban ah Burma (Myanmar) a, tulaiyin China le Laos chule Cambodia ahiuve. India sunglama Manipur a Meilhei te le Nepali/Gurkhalih, Assam, Arunachal Pradesh, Tripura, chule North India (Ludhiana, Punjab) gama itoh laiye ahi. Lhacha kinbolna ah hin meithai-chaga khohsah ding, genthei-hahsaho kithop ding, athi-amang khohsah ding tia Daanpia jong ineiyu ahitoh kilhonna, hiche nikhoa taona le thiltoinei houhi manchah ding ti ahin, thupitah a igeldiue angaiye.

Sermon thumakai

Hiche toh kilhonna Kipumkhatna thudol sermon/article khat hi anina issue a itahdoh nomun ahi. Kipumkhatna thudola sei ding le jildoh ding tampi umjong le hiche issue ah hin Pakai Jesu thempu len ahina a ataona le solchah Paul in kipumkhatna thudol toh kisai ho bou ana sei tadiu hite. Mun jouse le mi jouse kipumkhat tah a achenkhom dinguih Pathen lungdei ahi. Kipumkhatna kiti hi vannoi leiset in angaichat pen loikhat chu ahi. Ahin mun jousea kibung khenna, loitum semna, kipumkhat louna lunggel le natoh, lungngaituo, thuseina hojeh in boina tampi ikiloi den un ahi. Ikipum khat u angaiye. John 17:11,21 na ah, iPakaiyu Jesu Christa chun ama nungjuiho (eiho dinga jong) ataona chu: “Ka-pa theng, eini pumkhat ihi banga amaho jong pumkhat ahitheina dingun” ati.

Chule solchah Paul in, ‘Lhaova pumkhat hina dingin kihabol un kihabol un’ atie. Hijeh a chu Houbung ahung umlona khat chu ahile mijouse lhagao, lungthima, tahsa a, imalam jousea Christian hinkho a pumpia kipumkhat sahna dinga kithopi ding chu ahi. John lekhabu chun kipumkhatna aumlo akhohdan iPakaiyu Christa’n leiset adalhah masanga ataona a kon chun imu uvin ahi. Solchah Paul in Ephesia mite henga kipumkhat lou akhodon aseiyue. Kipumkhat kiti chu ipi ham? Ichang geiya ikipumkhat tah uvem ti ikihet theiyu ham?

Kipumkhatna hilou ho

Kipumkhatna het theina dingin itobang ho chu kipumkhatna hilou ham ti ana ve masaute.

Khatna, Kipumkhatna hi tahsa mihem semthu kilokhomna ho kipunkhomna (organizational unity) chu ahipoi. Christian Organisation ho phudoh jong ahipoi.



Nina ah, Kipumkhat na kitihi mi jouse kibahna (uniformity) ahideh poi. Miho lunggel le natoh jouse kibang jou kei ding kiti hi ahithe lou thil khat chu ahi. Eg. Hindutva's policy on one nation one language

Athumna ah, Kipumkhatna kitihi thuhil (doctrine) chungchanga mi jouse kito chet ding tina jong ahideh kit poi. Sapaova 'we agree to disagree' atiu banga midang lunggel achom ahina hetpeh le sanpeh chu ahi. 'In essential unity, in non-essential, in non-essential liberty, in all things charity.'

Achuti le Kipumkhatna chu ipi hitan-tem?

Khatna, kipumkhatna hi Pathen a kon chule Ama alailunga umna chu ahi. Pa le Chapa khat ahina kipumkhatna chu ahi. Hiche jeh a chu Pathen le mihem kah jengseh hilouva mihem le mihem kah jenga jong kipumkhat theina chu ahi.

Nina ah, Kipumkhatna kitihi lunggel kibah louna lah a kihet themna jalla pumkhatna (unity in diversity) ahi. Solchah Paul in, thilpeh jat chom chom (different gifts) aseiyin, khat le khat kipomtona chu ahi. Insung khat a minu, mipa, chule achateho jong thisan chedola a kibanglou ahivanga insung khat ahi tobang ahi.

Thumna, thuhil (doctrine) alhangpia kipompeh tona chu ahi. Thuhil abonin hetna kibang hih jong le kijatona le kingaikham tona ahi. Masang laiya houbung Pa-te (Church father) holah a khat St. Augustine kitipa thusei: "in essentials unity, in non-essentials liberty, and in all things charity" hi geldoh thei tah khat ahi. Aman aseina hi thuhil jong hi jat thumin ahin khenin, jat khat chu angaicha tahbeh ho - tekahna a huhhingna thudol hi compromise bolthei hilou jeh a chu essential ahi. Ahin adang ho chu ngaicha ahivanga cham-lhatna kipehtona angai ahin, thil jousea

kingailutna (charity) ngai ahi atie.

Kipumkhatna hi Ipi jeh a Ngaicha hitem?

Kipumkhatna umding dei jalla Christa thi ahin, chule vannoiya Ama thu lhangsapna dinga poimo ahi.

Khatna, Christian kipumkhatna hi apoimo dan chu Christa hiche ding jeh a thi ahi. Ephesians 2:13-16. Christa houbung khat semdohna dingin masanga kimelma a anaum Juda ho le gentile ho kah a kibung khenna chu Cross a sukkeh ahitai. Christian kichenna a kimang thucheng, "Pathenin agopsa chu mihemin sukhen hih hen" atibangin, Christa chu houbung kipumkhat dinga thi ahitoh lhonna eihon jong kipumkhatna itudet jing diu apoimo lheh e.

Nina, Vannoi miten atahsan theina dinguva poimo tah khat chu ahi. Solchah Paul khanga chu Juda mite le gentile te kibung khenna chu ana len tah ahi. Christa chun hiche nam kidou teni cross a agopkhom a houbung khat aso chun vannoiya thil kidang tah asuodoh ahi. Akikhetbeh niding jan a chu anungjuio pumkhat ahina dinga thempu hina a taovah ahi. Miho mutheiya kipumkhat ihuihin vannoi mite henga Christa iphuondohnau ahi. Thumna, Thahatna le kivenbitna dinga poimo tah chu ahi. Tulai hi vannoi hihen India sung hijong le vaipoho kikhel jing toh kilhonna Christian ho le houlama neochahchaho (minority religions) dingin pankhom lou ahithe poi. Thuchih lui khat in ana sei, "United we stand, divided we fall" (Ikipumkhat u le idin diu, ikibungkhen u le ilhah/kheh diu) atihit itih phat hihen koima jat lah hijong le adih jing khat chu ahi.

Vannoi miten atahsan theina diuva Christian te iti ikipumkhat thei diu ham?

Khatna, Kipumkhatna hi Pathen thilpeh (gift) ahin kipah tah a san ding

ahi. Pathen milungset le khotona jalla manbeiya eipeh u chu hiche kipumkhatna hi ahi. Ama le mihemte kipumkhat theina dinga achapa changkhat seh chu ahinpeh ahi. Pakai Jesu amatah chu vannotiya thilpeh lenpen ahin, mimal hinkho hihen jalhang hinkho hileh kipah tah a ikisan diu ahi. Pakai Christa vanga namchuom khenna umtalou, Juda le Greek mi kibung khenna beita, soh le sohlou umtalou, chule numei le pasal jong aumtapon, ibonchauva pumkhat ihu ahitai (Gal.3:28; Col.3:11).

Nina, Kipumkhatna hi bolding natoh khat ahi. Kipumkhatna hi thilpeh ahinah vangin, hichehi mihem toh ding jong umda lou ahi. Eihon iboldiu chu ahile ikihabol uva, kipumkhat na hi ilah uva umsa a pilhinsah ngai ahi. Christian ihivang uva ikah uva kibung khenna hi bei jeng deh dou ahi. Tekahna a Christian kilokhomna hoa jong nam le nam kithetna, phung le chang kivetna, numei le pasal a kinbolna kikhehsahna, anei le aneilou tihoa kibung khenna umda lou ahi. Hijong le hiche hohi Christa thuhil dung juiya ol ola suhtoh le boltoh ding hi eiho toh ding eikipeu ahi, imacha lolouva achama suhdihsa a um hilou ahi. Galatians 3:28 (see, also, Eph. 2:11-22; Col. 3:10-11 ven.

Thumna, Kipumkhat thei lounaho hetdoh a jo ding (overcome) ngaituo ding ahi. Satan in Christian te pumkhat ahiding adeilou ahin, hiche umlou na tei dinga nasatah a pan alah ahi. Kipumkhatna daltan tampi aumin, hiho lah a chu – eima kichang ngailut (selfishness), kiletsah/ kihoitho sah (pride) a midang toh kivop nomlou, lamkai thu ngainom louva eima le ihoubung dingbou gelna, kisel cheh chuh a thil bolna (not being transparent), eima gela adihbou chepi ding dei (midanghon adih helou dana gelna), chule adang dang

ahiuve. Hichengho jona (overcome) ibol thei uva ahile kipumkhatna chuhung um ding ahitai.

Thukhum khana

Achainan, mun jouse le mi jouse kipumkhat tah a achenkhom dinguih Pathen lungdei ahi.. Kipumkhatna hilou ho chu, khatna, tahsa mihem semthu kilokhomna ho kipunkhomna (organizational unity) chu ahipoi. Nina, mi jouse kibahsah na (uniformity) ahideh poi. Chule athumna ah, thuhil (doctrine) chungchanga mi jouse kito chet ding tina jong ahideh kit poi. Kipumkhatna hi Pathen a kon chule Ama alailunga umna chu ahi. Pa le Chapa khat ahibanga mihemho jong ahidingu adei ahi. Nina ah, Kipumkhatna kitihi lunggel kibanglou hijong le kihet themna jalla pumkhatna (unity in diversity) ahi. Thumna, thuhil (doctrine) alhangpia abonin hetna kibang hih jong le kijatona le kingaikham tona ahi.

Kipumkhatna apoimo je dan chu, Christa hiche ding jeh a thi ahi. Chule, vannoi miten atasan theina dinguva poimo tah khat chu ahi. Solchah Paul khanga Juda mite le gentile te kibung khenna le nam kidou teni cross a agopkhom a houbung khat aso ahi. Chukitle, thahatna le kivenbitna dinga poimo tah chu ahi. Kipumkhatna hi thilpeh (gift) chule bolding (task) khat ahin, Pathen thilpeh nasapen loi chu ahin, ahivanga eihon jong phatah a venbit ngai ahi. Hiche umna thei dinga kibung khenna theiho jona ineiyu ngai ahi.

Kipumkhatna dinga Christa'n eikouvu ahin, thempu ahina a pumkhat ithetheina dinguva taona eimanpeh nau le solchah Paul in iPakaiyu Jesu Christa minna pumkhat hina dia ana sut chu eima changval, insung chule houbung sunga bulhitsah dingin kigo cheh u hite. Lungluttah a sim le ngaiho jouse Pathenin phatthei boh tauhen.



MISSION REPORT

*Rev. Lamkeng Lhouvum,
Mission Secretary*
Mission Column

Thumakai

Pathen lungset le vangboh na jal in Kuki Baptist Convention Mission Department jong aki machal jing thei jin Pathen thangvah na sang pen kapen ahi. Gunchu tah le tomngai tah a sumle pai hihen taona le thumna a pan hinla jing Houbung mite chung a jong kakipa thu seijou lou kahin phongin ahi.

1. MBC Pulpit Exchange tour

Manipur Baptist Convention sunga kiloi khompi Association 29 hojouse achesa nisim 29/01/2023 nikho chun Mission Secretaries pulpit exchange tour programme ana um in, hiche toh lhonin, KBC Mission Secretary jong Kanakhu Baptist Church, (Chandel District) munna kiman chah na akinei in ahi.

2. Tahsan thah ana kibe

Pathen lungset in achesa nisim 29/01/2023 nikho chun KBC in Mission na itoh nao Maohing Gorkha Nepali Mission field munna Christa a hinna dih tah le tahsan thah sopi mini ana kibe in ahi. Am-



ani hi Hindu back-ground neicheh ahihlon in hijong le eiho Missionary ho tompan nale thu lhangsap jalla kikhel na ahin neihlon jeh in Pathen thangvah na sangpen epeo vin ahi.

3. KBC Missionary munchom a umho toh kimu tona

Achesa Nisim 30/01/2023 nikho chun munchom chom'a um eiho KBC Missionary hon Head Office mun vilna ahung nei uvin ahi. Amaho hi tuchung the 70th Geberal Assembly 2023 a hung jao ahiu vin ahi. Office munna Field umdan, natoh dan chuleh eti pan lah khomma Pakai lenggam na itoh naohi machal thei ding ham ti kihou lim khomna akinei to lhonin, taokhom na ana kimang khomin ahi.

4. Sugnu Mission Field munna Hostel ministry kipan ta

Achesa 02/02/2023 nikho chun Pathen lungset jallin Good News for Manipur tia kimin vo Sugnu Mission Centre munna Hostel ministry akipan tan ahi. Hiche munna hi apat na adin Chapang 9 to-bang in enrolled abol in ahi. Pathen in hiche lai munna ministry kibol aphung vuh jinga amachal jing thei na dingin itao naova ana gel doh jingo hite.

5. KBC Gorkha Nepali Mission Field Kanglatongbi munna tahsan thah ana kibe KBC in Mission Field a inei u Kanglatongbi (Kangpokpi District) munna Missionary ho tomngai na jallin achesa nisim 5/02/2023 tahsan thah ana kibe kit in ahi. Amahi Kanglatongbi a um ahin, Pathen thu ngaicha mama a umjing mikhat ahi. Follow up programme aum jingtoh Ihonin amahin Tuilut najong anei tan Pathen thangvah na sangpen epeo vin ahi.

7. Apostolic Indian Mission ten Office hungvil

Achesa 20/02/2023 nikho chun Apostolic Indian Mission lamkai Pakai lhacha Pastor Chungkhogin Sithhou leh Pu. R. H Hmingliana Hmar in KBC Mission Office mun vilna ahung nei Ihonnin ahi. Apostolic Indian Mission hohin tule tuhin mun chom chom a Missionary 45 tobang asoldoh taovin ahi. Pathen in pha asah a ahile phatkhat le tongkhom thei ehi na diu jong ana gal dot jingu hite.

8. Dongsum munna Meitei Mission Field khat hon be ding

Achesa nisim 20/02/2023 nikho chun Dongsum Baptist Church (KBC No. 2) munna Houbung lamkai ho makai na in khosunga Meitei Family 8 tobang um hohi Mission field khat a vetsui thei ding ham tin kihou naleh vetlhah na aga kinei in ahi. Hiche toh Ihonin Pathen in pha asah leh hiche lai mun hi Meitei Mission Field natoh na khat a semdoh ding ti lunggel akinei toh Ihonin taona a ena gel-doh cheh diuvin jong deisah ahi.

9. KBC Mission Board luiho lhahna



Pathen lungset in KBC Mission natoh na a lung le tha hin kenga Mission natoh machal na dinga KBC Assembly in alhen doh lamkai ho term lhingsetna

mopoh na ahinnei nao chung a vailhah na akinei tan ahi. Achesa Pakai kum 2019-2022 sunga



Mission Board members hochu:-

1. Pu. S. Athang Haokip (Chairman)
2. Pu. Thangkholun (Vice-Chairman)
3. Pu. Haojakam Dounge (Member)
4. (L) Pu. Neka Vaiphei (Recorder)

Amaho chenghi term lhingset a hung pang lamkai ho ahiuve. Hijongle vangset umtah in Pu. Neka Vaiphei in a leiset kholjin na chaiya Pa kom'a acholdo tah jeh in vangset um akisa lheh jengin ahi. Hijeh chun nisim 23rd Feb. 2023 nikho chun insung mite vilna toh gom'in lamkai lui ho vailhah na kin chu Pu. Neka Vaiphei in neipi Pi. Lhingcha in host abol'in programme chu lolhing tah in ana kibol in ahi. KBC Mission Board member athah ho hihen aluiho hijong leh Pathen in phatthei boh jing taken.

Thukhum khana

KBC in Pathen Lenggam na itoh nao phatthei boh jing henlang tule malam hinkho a project jatchom chom umho jong tongdoh jom jing thei ding eiphung vuh cheh taohen.

Pu. Neka Vaiphei (KBC Mission Board Member)

ana mollem ta



Pu Neka Vaiphei hi, KBC Mission Board Member 2019-2022, kum sunga Board Member term lhingset ahinpon ahi. Amahi Achesa Nisim 7/02/2023 (Tuesday) nikho in tahsa dammo na jeh in RIMS Imphal munna Pa kom'a a choldo dingin angai cheng a insung mite le houbung micheng ana dalha tan ahi.

Amahi mission natoh gelkho jing leh lhagao mangthai ding ho huhhingna dinga gunchu tah a pan lajing mipa khat ahi. Amopoh na gelkhoh jingle Mission thu a kalson na dinga boina thu seilou hel a Pakai minna kalsong jing ahi. KBC Mission na itoh naova jong itobang phat in lhun khum jeng jingle Convention khantou na le machal na ding ahiphot le tia kalsong jing, Missionary hole Evangelists ho gelkhoh jing jong ahi. Hitobang mi mantam tah khat in eida lhah uhi KBC pumpi le houbung a dia man na lentah khat chu ahitai.

Pathen in adalhah a insung mite jouse lungmonna pejig taken.



MEN COLUMN

Rev. Thanggin Touthang
KBC No.10 (Singnat Pastorate)

COLUMN

Muntina umHoubung mitele Pateho jouse kangailutnao Pakai min in salam kahin peouve chule Men Department khantounale mach-alnaho achom lam taha report petheija kaumjeh in, hatchung nung pathen kathang vahe.

1. Convention Men Department hung kiphudoh nikho:-

(a) 1981 26th March nikhon pakai lhacha Lamkai masahon Convention Men Department hi anaphudohun, Pathen lungsetna jalin tunichan geija Pate (Men Department) kiloi khomna phate cha achejom jing thei jeh in pathen thangvahna epeouve.

(b) Lamkai masa hon ibolla Pate (Men Department) kiloi khomna hi ana phudohu hitem? ajeh chu mihem hi kiloi khomna beija na kitong dohteilou ahi.

(c) Men Department kiloi khomna a konna Pakai lenggam natoh dinga Misssionary chopding /goiding lung tupnale lunggelna len-tah aneijehuva hiche kiloi khomnahi ana phudohu ahi.

(d) Lamkai masaho lunggel bangin Convention Men Department in jong pakai lenggam kehletbe nadingle ama lenggam khan touna dingin aminchehu kisei hih jongle Missionary mi 4 (li) anagoiun tuni chan in jong akigoi jom jing thei jeh in jong pathen kathang vahe.

2. "Permanent Missionary Fund (PMF)" ahung kiphudohna:-

(a) Convention Pate kiloi khomna ahung kiphudoh toh kilhon in-Missionary goiding/chopding kiphatsahna ahungum toh kilhon in "Permanent Missinary Fund" (PMF) jong ahung kiphu doh thatan ahi. Hiche permanent Missionary Fund ahung kiphu til chun mipa khat in Rs. 50/- pehsah keiding chule hetjingna "Certificaate" jong pehcheh ding tin anakipan in, abaan in Rs. 100/ cheh mipaten pehsah keiding, aphot dung juijin ahung kalkitin mipa khat in Rs. 200/- cheh pehsah kei ding chule Rs. 2000/- chunglang hinpeho kipapi najal la hetjingna Memento khatcheh pehding kiphatsah toh kilhon in amin chehu kisei hih jongle mitampi Rs.



2000- chung lam ahin pen hiho jong chu kipapina jalin Mamento jong ana kipesoh keije.

(b) 2022 kum in "Permanent Missionary Fund" Pate Missionary Fund (PMF) na kikhel:- Ibolla ' Permanent" chu " Pate" a kikhel ham? Permanet akiti tengle mikhat in Rs 50/ ahiloule Rs 100/ Rs 200 ahilou jongle Rs. 500/- khatve apehle kichai jeng thei ahije-ha pate Missionary kikhel ahi. Pate missionary akitengle mijousen mission natohna chu avel avela jong apeh thei ahi vetsahna in Pu Paothang Manlun Pangjang Baptist Churc Gambih NO. 2 in 2022 kumma Rs 200 pate mikhat inapehcheh ding Rs. 2000/- a at chunglam peho kipana jalla Mamento pehding ana kitichu Rs 2000/ apen kipana jalin Mamento anakipen , 2022 kumma pat Rs 500/ mipa khat in apeh ding Rs. 5000/- chunglam peho kipana jalla Memamento pehding akitikit phat in Pu Paothangin Rs. 5000/- ahin pe kite hiche teni tailou in jong Rs. 50/- ahilai jin jong Rs. 500/- jong anapen hiche receipt jong jong chu tuni geijin akoin-alaije . Pu Paothang Manluhi Patee Missionary Fund pehnahin vet-jui thei tah ahi . chule ma tilou midang jong nive thumve pejong aum in amaho chung a kipa thu ahung kiphonge. hitading kikhel chu ahung kikhel kitin " Pate Missionary Fund " joh in ahung kikhel kitin chule Pate mikhat in "Pate Missionary Fund" (PMF) a ding Rs 500/- cheh apehding chule Rs. 5000/- apat chung lang hinpeho jouse kipanajala kipa thilpeha "Mamento " khatcheh jong anakipesoh keije.

(3) 2022 kumsung in amincheh u kisun jouhih jongle pate mitam-tah in "Pate Missionary Fund" (PMF) Rs. 500/- a pet chung lang kitichu mitampin ahin peouvin, chule Rs. 5, 000/- (sangnga) apat chung lang hinpeho kipana jalla Mamento pehding kitichu mitampin ahin pen hilailaha atampeh pen chu ahile Pu Ngam-lenminthang Haokip in Rs. 20,000/- (sangsomni) S. Lhangnom Baptist church Gambih No. 12 in ahinpen chule adang ahinpehohi aminchehun kipha pohjouhih jong " Pate Missionary Fund" hinpeho jouse chung a kipa thu ahung kiphonge pathen in phatthei naboh soh kei taohen.

(4) Tukum 2023 a Pate Missionary Fund (PMF) pehding dan :- Tukumma jong kumdanga banga Pakai lenggam natohna dinga koi hijongle Pate khat in Rs. 500/- apethei chan in apehcheh ding, chule pakai lenggam khantounale machal na dinga Rs. 5000/- chunglam hinpe aumle kumdanga banga kipana jalla Ma-

mento khath cheh pehding ding ahi hiche Memento pehding deina jeha pehding hilouvin Pate Missionary chopna dingle goin-adinga apehcheh dingin pakai min kahin temuve, napehle nakisih loubeh ding ahi.

(5) Convention Men Department (Pate kiloi khomna) alolhin natheiding:-Convention Men Department kiloikhomna alolhin nadingle amachal jingna thei dinga pan itilah ding hitam? Ikilole lolhing thei dingham? muntinna um Pate insung jite chate in ek-ineppiule ekisonpi bangin i kiloi khomnao Convention Men Department in jong kisonppitah le kineppitah bangcheh in panla dingin temna kahin neijuve, chule eima panna theicheha , pehdinga lomho hihen lang todinga lomho hijongle, pecheh tocheh tongcheh leohen, convention Men Department pakai lenggam natohna khangtou intin, lolhing lhingtane napan lahnachu nakisih lou beh ding ahi.

(6) LOM RESOURCE CENTRE (LRC):-

(a). Lom resource Centre mun na natohjong ache lhajingin pathen lungsetna jalin akhang toujing in,Thingphung ,Gophung chule adang dang akitu kala val in jong Gancha Vohcha jong akivah jingin ahi.

(b). Kolchu (sugarcane) kumkhat masanga anakitu kolchu chu pathen lungsetna jalin akijoh pantan kipa aumiheh jenge, pathen in pha asahle abanban najong johthei hungumin tin pate a dinga source income phatah khat hung hidinghi kinepna lentah eneiju ahi hijeh hin pathen henga taona tothhoa pontho taha pan lajing dingin jong pakai min pate temna jong kahin neijuve.

(c) Lom Resource Centre munna hin aphantseh in natoh ding atom in Chawkidar/Farm worker pan jong ajochan in na atongin amun aletjeh in amachangin ajoujoujipon, pakai minna kipehna natong ding mi akingaicha jinge, nigkum 2022 kum chun aminchehu avel in hung kiphapoh tahih jongle mi tamtah Gambih levela Pate chule Houbung levella Pate chule Convention Men Work Commiitte ho chule Gambih levela Work Committee ho mitamtah pakai min in kipehna in ahung kon un natampi akitongdohe, tukum 2023 kumma jong pakai minna koi Gambih hihenlang koi Houbung Pate hijongle pakai minna kipehna na kipehna ahung konthei chan hung kon kit dingin temna ahung kineiye pakai minna natohnao chu athon hiponte pakai jin nahetpeh in pakai anga

kipaman nasan ding ahi hungun hung kon nakisih lou ding ahi.

(d) Lom Resource centre (LRC) :-

Lom Resource Centre munhi Convention Pate Men Department in tuni changeija thale jung lungthim chule sumle pai lutna kho-nung ding gelna pankilajing ahi. Tuni chan in Chawkder khat ekoi-jun aman jong jochan in na atongin ahinla mikhat mini natoha kichai jeng thei ahiloujeh in aphaatdung juile natoh atam dungjuijin natong ding mingaichat ahijinge sumle pai tamtah lutna nakito-nghi pathen in pha asahle khonungle Pate pakai lenggam natohna a source dihtah khat hunghiding kinepnale thanopna jala malam kinojing ahi .

KIPA THUSEINA



Achesa nisim 15/2/2023 Vahchanni in KBC C/C New Lambulane Houbung mite leh Meitei B/C Tribal Colony ho jaona in Bus alenho thum(3) leh Gari/Car 7 in Elijah Taona Mol Gothol muna mi 178 in jingkah lam nidan 8:30 Cm. a konin nilhah lam nidan 2:00 Cn. chan Taokhomna kaga nei un hiche nikho a hungcho jouse chung a kipathu kahin phong un Pathen thangvah in um-jing tachen.

Kakipah u've

Rev. Thanglen Haokip, Church Pastor

Haopu Singsit

Church Secretary, C/C New Lambulane Imphal

Women Column

CHILDREN DEPARTMENT

Pretty Lhingneilam
Director, Children Department
 Women Column

1. CHILDREN WORSHIP SERVICE; TRAINING OF TRAINERS

Achesa nisim 19 apat 21 January sungin ST.Paul's Retreat Centre mun a CWS Jilkungho ding Training lolhing tah in ana kibol in ahi. Resource person mi 4 ahi in, Rev.Dr.Paul Paolen, Rev.Dr.Satminlen Khongsai, Miss.Sherlyn Khongsai le Ms.Pretty Lhingneilam jaona'n 'Transformation over Information' ti topic mangchan kihilna ana ki-nei in ahi. Jilkung min kikhum jat chu mi 47 ahiuvin ahi.



Lhagao thu jeng hilouvin, Tahsa lam a kisuh halna leh chapang hon jilkungho aloi agol banga agel theina dingu geia jong kihil na aumin ahi. Jilkung le chapangho kikah a ima khentumna umlouva Pathen thu ahina ding bang tah a hilchen peh a juisah ding tihi Training in atup pipen chu ahi. Pathen thu ahet keuseh hilouva ajui nathei diuvin jong lekhahu akisem in hiche chu jilkung hon ama ama chapang ho phatea ahilson diuva tepna jong akinei in ahi.



2. CHILDREN DEPARTMENT WEB-SITE THENSO HITA

Achesa nisim 7, February, 2023 nikhon Lamkai thah kilheng holeh Office staffs ho sesen ankong sokhom na akinei toh kilhon in Pu GS, Rev.Dr.M.Thongkhosei Haokip in Children Department official web-site hondohna le thensona anei in

ahi. Hiche website hi CWS (Children Worship Service) Jilkung ho dinga Information pehna mun hung hiding ahi. Hiche goh hilouva minu mipa chate kimanchahna henom le munom ho dinga munkhat hiding, Children Department a kitongdoh jouse kholtup le koitupna munjong hiding ahi.

3. CWS KAIKHOM MASAPEN:

Nisim 7, February, 2023 nikhon Lamkai thah kilheng holeh Office staffs ho sesen ankong sokhom na akinei toh kilhon in Pu GS, Rev. Dr.M.Thongkhosei Haokip in Children Department official website



hondohna le thensona anei in ahi. Hiche website hi CWS (Children Worship Service) Jilkung ho dinga Information pehna mun hung hiding ahi.




Hiche goh hilouva minu mipa chate kimanchahna henom le munom ho dinga munkhat hiding, Children Department a kitongdoh jouse kholtup le koitupna munjong hiding ahi.



#Web Address: kbcchd.org C/C B. Vengnom le C/C Sangaikot Children Department in kum 2023 adinga CWS (Children Worship Service) kaikhom masapen nisim 12, Sunday nikhon ana nei tauvin ahi. Chapangho le Jilkungho jong atha u anomlkeh jengin, Pathen in phatthei bohjing tauhen.

4. CWS HANDBOOK BAILAM TAH A MUTHEI HITA:

Muntin a um CWS nei Houbung jouse henga hetsah chu ahileh CWS Chapang hon achoi dingu Handbook kisem chu chai ahitan, bailam tah a KBC Office mun a muthei ahi. Hiche lekhabu hi CWS Chapangho dinga kisem ahin, Chapangho achan soh tengle bou mipi adinga johthei hibep ding ahi. Aman hi 120 Rupees ahi in, adei chan in Children Department Director contact bol thei ahi.



WOMEN QUARTER

Achesa nisim 12, February, 2023 Pathen nikho'n kumsot tah ana



kiboipi Women Secretary Quarter chu Then-so nale lhandohna Rev. Thongkholun, Finance Secretary in anei in ahi. Muntinna nute'n siki, makhai ahinchoi khom uva Pathen lenggam adinga jochan a pan alah najal un Women Department

adin tohga molso in aum thei in, Nute jouse panlah nale taona jal in Pathen ithangvah un ahi.



YOUTH DEPARTMENT

*Rev. Lunkhosei Tuboi,
Secretary, Youth Department, KBC*

Youth Column

KBC Youth Department tohgon nanoiia Rehabilitation Center isah uchu tuhin jokon cha ahung hitan ahi. Hiche Rehab kisah lo na pen hi, khonung'a hung khan len ding chate naote ho tulai kham nathei ho akon na akiven bit thei nadiu le adeh'a tulaija kham nathei jin apui



mang chate naote chule minu mipa tam tah ho lah a mikhat le nibeh hijong le huhdoh na akinei thei nadia kigong mun chu ahin ahi.

Tulai Mission na itoh naova iha gel khoh pen u chu ahile Paodang tho ahilou le kol le vai, eima mi ho kal-lam a um imi isa iki bah pi lou hou bou hi iha khoh sah lait ah u chu ahi. Alang khat na dih jong adih nai ajeh chu Kuki chate te hi alhang pia Jesu Christa nungjui Christian te chu ihi tao ve ahinlah, eiho lah a Jesu Christa kisan lou ho hi Lhagao mangthai ahiuve ti igel doh diuva avella kahin tah lang ahi.

Tu phat ahoipet cha a hi eiho lah a phatea Pathen thu dih tah iki hil lou uva ahile, kum som jou lang le imi isa hou hi abon uva non-Christian hung kisoah ding Houbung hung lhasam a I Pathen natoh nao jong hung hat jou lou ding chu ahitai.

Hiti ho hi akigelle, KBC ahilou le Houbung in jong hiche din mun nahin pan la cheh u hitin, eiho lam a Lhagao mangthai ja um isopi i-u i-nao te hou jouse hi nung chu cheh thei leu hen tia kahin tep na jong kahin nei ahie.

Tule tua kisajing KBC Rehab Center hi eihon jng hinkhoh sah cheh u hite tia jong Pakai min na tem na kahin nei ahi.

Kakipah'e

Rev. Lunkhosei Tuboi, Youth Secretary, KBC

MUSIC

*Rev. Lunkhosei Tuboi,
Secretary, Youth Department, KBC*

Music Column

ALIVEI CHAN NA MUSIC MOBILIZATION PROGRAM CHAI HITA

Achesa Nisim 17/02/2023 Friday nin KBC Music Committee tohgon nanoija Music Mobilization program chu KBC Gambih No. 3 le 19 gamkai ni kigom khom in KBC Centre Church Salem Saikul, Gambih No.3 mun ah Music Committee Sponsor nanoijin ana kibol in mi 70 lam pan nan Lolhing tah in Program chu ana kichai tan ahi.



Hiche Program a Resource Person a ei pan pih hou chu

1. Pu Rev.Dr. Paul Paolen Haokip, (Topic: Praise & Worship chule Church Choir)
2. Pu Lunpao Haokip, (Topic: KBC Music Vision)
3. Pa Demkhogin Haokip ahiuvin ahi. (Topic: Live Sound Reinforcement chule Houbung) ti Thupi mang chan kitil khou um tah tah thugil lagil akingai lhan kipa na asang lheh jeng in ahi.

Chule Ng. Nengpilhing le Ng. Hoiminchong in jong vahchoi la ngeit-ah tah eisah pih un kipa na asang lheh jenge.

Hiche Program kiman na a neh le don ei gon tup pih u KBC Centre Church Salem Saikul Deacon Board makai na a lhacha kin ei toh pih hou chung'a ajong kipa na alen in ahi.

Pathen in phatthei boh cheh tao hen.

KBC Music machal jing hen Pathen in eima pui jing tao hen.
Kakipah'e

Kipa thu thakhel a hin phong

Rev. Seiboi Tuboi

Youth & Music Secretary KBC

HOLISTIC DEVELOPMENT

DR. Seilenkap Haokip

Holistic Development

Holistic Development Committee in mobilization drive nasatah akimachal pijing toh kilhon in February 10th nikhon Gambih No. 12 ading in Chahkap mun ah anakibol in chule C/C Neihsial veng ah 18th Feb. nikhon anakibol in 19th Feb nikhon jong C/C B.Vengnom mun ah chu jongle 26th Feb nikhon Songphel



B/C, KBC No.2 mun ah lolhing tah in anakibol in ahi.

Hiche mobilization drive a kon hin Houbung mi tampin Thrift saving account, loan chule fixec deposit facilities ho kilemtah in ana muthei yun ahi. Hitobang mobilization drive/seminar hi hung kibol jing ding ahijeh in ngaichat na nei Houbung hole mimal a lunglutna neihon Holistic Development contact boljing thei ding ahi.

Chule organic farming training jong akimachal pi jing toh Ihon in 23rd to 25th February in Phalbung B/C KBC No.16 khomun ah lolhing tah in anakibol in ahi. Thanopna le lunglutna neiho a ding in lampi akihong jing e.

Thrift saving hole organic farming hetbe nom le lunglutna neihon anoia hung kipe contact number a hi thuchen hetthei ding ahi.

Contact: 8787319958/8413034697/8766294364



LITERATURE & PUBLICATION

Secretary, Literature & Publication, KBC

Literature & Pub. Column

KBC SUNDAY SCHOOL TEACHERS' TRAINING LOLHING TAH A KICHAH

Centre Church Chavangphai, Moreh mun a Feb nisim 1 nilhah a kipan KBC Sunday School Teachers' Training chu lolhing tah in janhi (5/2/23) nilhah chun khumkha ahitai.

Closing program a chun Rev. Thangkhosei Haokip, Secretary, Literature & Publication Board, KBC in training lolhing tah a host bol CC Chavangphai houbung mite chung a kipana aphonthoh lhon in training toh kisaiya program a minchong ho kipa thilpeh ana pen ahi.

KBC Gambih chom chom a houbung 137 a kon in training a jao Sunday School oja (Teachers) numei pasal agom in mi 542 alhing in ahi.



Resource persons a pang Pr. Jamthenlal Haokip, Headmaster DCA, Moreh in seminar class ah "Christian Ethical Reflection on Creation Care" ti hilna aneiyin, Pr. Seikhogin Haokip, Pastor CC Molnoi Area in "Biblical Hermeneutics" topic aseiyin, Pr. Lunlal Dounge, Asst. Prof. STS in "Sunday School Teachers and it's method of teaching" ahillin chule Rev. Onkho Haokip, Pastor Neihsel Veng in "Sermon semdan le thusei dan (Homiletics)" hilna aneie. Pr. Shoson Haokip, Pr. Ngamboi Haokip chule Pr.

Thangtinsei Haokip hon jong Sunday School chapang ho hilding dan ana hil un ahi.

Nilhah Worship Service ho ah Pr. Lunlal Doungei, Asst. Prof. STS, Rev. Lettinlal Chongloi Pastor, CC Chavangphai chule Rev. Onkho Haokip Pastor, CC Neihsel Veng in Pathen thuah mipite ana suhal un ahi.

Choreographers (lam le la hilla pang) mi 5 Gl. Haoneo Baite, Ng. Thethem, Ng. Channu, Ng. Hoipi leh Ng. Nemboi hon training a jao ojaho la 7 ahilthem un ahi.

Worship song leaders mi 7 ho Pr. Shoson CC Chikim Khopi, Gl. Travis Thangminlen Touthang, Gl. Thanggin Mate, Ng. Lhingbem Baite, Ng. Nengkhanthem Mate, Ng. Tinneithem Haokip, Ng. Nengchonghoi Haokip hon jong kaikhom seh in mipi lasah khomna alamkaiyun ahi.

Sei thei khat chu, training a jao ho neh le chah din training kibol-na houbung in vohcha 5 le bong 4 athat un, buhon mi 24, mehon mi 30 chule ushers mi 40 nasatah in pan alauvin ahi. Sun le jan in don ding tuilum, chasan, chaphan, bongnoi lhasam louvin aum-jing theiyin ahi.

Chavangphai houbung, Moreh hi 1992 kuma ana kiphutdoh ahin, tutua houin hi aletdan 60x100 ft ahin, houbung injat hi 128 ahi. Pathen in CC Chavangphai houbung mite phatthei bohjing tahlen!

Tripua Missioary Ni in Field jonkitta



Tunin Missionary Pastor Seikholen Guite leh Missionary Lenkhohao Haokip Tripura Mission field jon din tujingkah chun akalsong doh lhon tan ahi.

Tuhin Khongsang apha hon tan ahi. Ana damselsel un. Damsel'a alhun thei lhon ding in Pathen henga taona in gel doh jingu hite.

CHRISTIAN EDUCATION DEPARTMENT

*Rev. Dr. Letthang Haokip
Secretary, Education Board*

Christian Edu. Column

NEW CHRISTIAN EDUCATION BOARD MEMBERS:

- | | |
|--------------------------|------------|
| 1. Dr. Zamkhokhai Haokip | B/Chairman |
| 2. Dr. Seikhohal Kom | Member |
| 3. Pu Tongkholun Haokip | do |
| 4. Pi Lhaijahat Doungel | do |

Amaho chenghi tuchung 70th KBC General Assembly Ekou Mulam mun a chu Christian Education Board 2023-2024 Members dinga Pathen le Mipitehon anakilheng doh ho chu ahiuve. Amaho cheng hungha pan najal a Education toh kisai a khantou machal na ahung umding ikinepnao toh kilhon in abon chaovin ilemuve.

DINGPI MISSION SCHOOL VISIT:

Dt. 06/02/2023 Dingpi Mission School jilkung athah a kila Gl. Thangtinlen leh Gl Paominlen Haokip chule Ms. Roslyn Khong-



sai DMS a dingin Pu Zamkhokhai Haokip , Chairman CEB lamkainan School viltoh kigom in agakithah in chujongle CASA pon hopdoh najong anakinei in ahi.



KUKI BAPTIST CONVENTION

70TH GENERAL ASSEMBLY LOLHING TAH'A ANA KICHAITA

Kuki Baptist Convention (KBC) chun achesa Tolbol (January) ni-sim 23-26, 2023 sung chun Saikul to kinaicha a um Ekou Mulam Baptist Church mun a chun 70 lhinna General Assembly lolhing tah in ana kineitan ahi.

KBC sung'a lamchom chom'a mopohna chang lamkai tamtahho le Pensioner-ho jaona in Gambih 1-25 le houbung 313 akon tha lheng lamkai agom in mi 400 vel in pan anala uvin ahi.



KBC sung'a Convention Executive Committee, Department umho, Committee umho, Board umho le Institution umho in 2022 kum sung'a anatoth danhou mipi angsung'ah tohphon hoitah in apevin ahi.

2022 kum sung'a tohphonho ngailhah ahitoh lhon in 2023 kum sung'a tohgon kineiho jong mipi angsung'ah luidohna ana umin mipin lungil tah in ana gelkhom uvin kilolna jong ana sem uvin ahi.

Hiche kilolna tamtah lah'a tahleng thei phabepho chu:

1. Chikim Baptist Church leh Haolenphai Baptist Church Centre Church a lahlut hita.

2. Constitution dungjui le ngaichat ahi dungjuiyin Worker mi pha bep Transfer/posting thah ana kibol in ahi.

Assembly sung'a Worker phabep in Pakai le mipi angung'ah kitepna (oath taking) analauvin ahi.

KBC Honorary Elected Officers kikhel kum ahitoh Ihon in Assembly mipi deilhen tah in Rev. Khupthang Kilong, chu 2023 – 2024 sung'a KBC President dinmun le mopohna ana chang tai. Chuleh 2023 – 2024 a KBC Elected Officers mopohna thah lading jouse Rev. Dr. M. Thongkhosei Haokip, in taopehna le vangthumpehna jong ana neiyin ahi.

Assembly sung'ah nilhah seh in Pathen houkhomna ana um jingin, Rev. Boipu Serto, Mission Secretary CBCNEI, Rev. Tongjam Haokip, Rev. Onmang Haokip le Rev. Tonglet Haokip speaker hina in "Hung uvin kihoutoh uhite," (Isaiah 1:18) kiti thupi mang cha in kitilkhouna ana um jing in ahi.

Assembly sung'ah jingkahseh in Rev. Lamkeng Lhouvum, Rev. Dr. Letkthothang Haokip le Rev. T. Thangkhosei Haokip makaina in Pathen heng'a taokhomna ana um jingin ahi.

2022 kum sung'a Hopsom le Maicham hinpeho ama houbung mi umdan toh kitoh'a asangpen 10 hi kipapina jong ana um in ahi. Pastor-ho lah'a anatohnaa agunchu le tohphatna neiho jong kipapina ana um in ahi.

Kaikhomna hoah KBC Central Choir, KBC No. 19 Choir, CBCA Saikul Choir, KRBCA Makokching Choir, Centre Church Salem Saikul Choir ho akon in Pathen vahchoina la ngeitah tah ana kingailha in ahi. 2022 kum sung'a ana mollemsa ngaicheng gel dohna le adalhah insung mite taopehna jong ana um in ahi.

KBC Gambih No. 19 in Ekou Mulam Baptist Church mun'a 70th General Assembly lolhing tah'a host eibol peh nachung uva Pastor pa le atohkhompi Gambih lamkaiho, COLA, Ushers chule Ekou Mulam Houbung mipite hapanna jal in mipi annehna, twi donna, gena, touna, kisilna twilum le ijakai kisuhtah le nomtah in ana chellha in ahi.

Pathen in Kuki Baptist Convention hi nam sung le vannoiya hinna thu salvah jing dingin phatthei boh jom jing taken.





KBC KIVAIHOMNA A PIPU ATHAH LE ALUI KIKHELTA



70th KBC General Assembly lolhingtah a akichaitoh lhonna Rev. Khupkhothang Kilong KBC President thah dia lhendoh ahung hitan, Rev. Khupkhothang Kilong KBC President natoh ahin toh tahding jeh in Pathen in hin dinpi jing taken, hin mangcha jong taken.

"Pathenin vaihom themna chihna petahen"

Hiche toh kilhon chun Rev. Tonglet Haokip, Former President KBC lhahna 7th February, 2023 nikhon KBC Head Office chapel Hall mun a ana kimang khom in ama jong KBC President amopoh na sung a atoh phatna ho kipapina jal in Memento hoitah khat akiye in kilom tah in lhahdoh na kin ana kimang in ahi.

OFFICE STAFF KIKHUT KHELNA LEH TOHMUN LOTHAH



Administrative Office a staff appointment thah phabep le staff tohmun kikhelna ana um hochu achesa nisim 2nd February 2023 nikhon taonale chadon khomna kin khat in ana kimang in Pu General Secretary in lhahdoh na ana neitoh kilhon in tilkhouna toh tho in tohna cheh losah ahitaove.

KBC Gambih No.7 Workers'Seminar lolhingtah a kichai ta.

Achesa Nisim 22nd Feb 2023 nikhon New Keithelmanbi Gambih Centre KBC Gambih No.7. mun ah Gambih Worker's Seminar nikho khat "Amaho chu lungthim dihtah leh khutthem tah in alamkaijinge" Psalm.78:72. ti thupi mangcha in Rev Lamkeng Lhomvum, Mission & Evangelism Secretary KBC (I) leh Resource Persons:-Rev. Tonglet Haokip, Former president KBC (I) chuleh Pu.Lhunkhomang DOUNGEL Accountant KBC (I) in kichuhna einanei un, chuleh Rev. D DOUNGEL, Pastor Khoken B/C. in devotion eina neipeh un ahi.



Gambih No.7 in' kumtoh gonna kinei 20 to 22 feb 2023 sung in Houbung lamkai agomma mi 140 vel panlau vin ahi.

Chuleh Mipi nehleh chah gena touna ijakai a panhinla' a hungkisa-lal Host Church Gambih Centre New keithelmanbi Houbung lamkai holeh lhacha a pang jouse chung a kipa na sangtah akiphong in ahi, Natoh phat nao Pathen in phatthei naboh taohen.

Kakipah e,
Rev. Mangboi, Pastor KBC Gambih No 7

AN-NGOL TAONA

KBC CENTRE CHURCH S. KANAN VENG
Youth Department



Horeb taona mol ah 18 February 2023 nikhon Gl. Paokam in Lhagao thua tilkhouna aneitoh lhon in Ng.Olem Lhingpineng in taona phat jouse eina lamkai uvin lolhing tah in ana kimang in ahi.



Joujangtek kho mun a pansa K.Songjang (ECA) kho Eviction ana kibol chu 24 February nikho in Ja umtah KBC office lang a kon in lamkai hon ngailut na neitah in Hamsetna chung hijonle miteho vilna le thilpeh na ana nei uvin chule General Secretary pa a kon in "Pathen a ki ngai ding" tia lungmon umtah tilkhon na jong a hinsei in hijeh chun lamkai ho chung a kipana sangtah kahin phong uve.

Office Secretaries hon ahung vil u hi Convention pumpi in avil na tobang a kila ahi jou in K. Songjang ho talheng in jong kipana sangpen kahin lhut e.

Pathen in KBC phatthei boh jing hen.



MB Saichang, Gambih No. 11



Kumthah ahung hito kilhon in Pastor phabep jong transfer le posting changho ahung kiheitoh soh tan, Pastor hon aumna gamkai Tour apat uto kilhon in Thempu kin jong ahin machalpi pantaovin, Nisim 19th February 23 in Gambih No. 11, Pastor Rev. Paosei Haokip in jong MB. Saichang BC a Kumthah a ding in Pakai Ankjon kin amasa pen chu ana boltan ahi.



Devt. prog. noija Organic
Farming natoh chelhah pet.



Edu. Secy. Dr. Lethang
in DM S vilna aganeijin ahi.



1st Gb. No. 23 An Ngol
Taokhom, at G.Kholep B/Ch.

Post Regd. MNP/81
Regd. No. 18134/88



2023-2024 a ding a
Lamkai thah
kilheng doh ho



2023 KBC general
Assembly sung a
jingkah Devotion



2023 General
Assembly a
Oat-Taking laho



If undelivered, Please return to
The Editor, KBCThuso
Kuki Baptist Convention
Opp. DM College, Imphal - 795001
Contact : 9662633173